

## AEON ringan beban golongan miskin



**PENERIMA** sumbangan bersama Saifuddin Nasution (berdiri, empat dari kanan) dan tetamu kehormat pada program 'Kembali ke Sekolah' yang berlangsung di AEON Bukit Mertajam, Pulau Pinang baru-baru ini.

AEON Co (M) Bhd, AEON Credit Service Malaysia Berhad bersama Kementerian Perdagangan Dalam Negeri dan Hal Ehwal Pengguna (KPDNHEP) telah menyampaikan sumbangan berupa pakaian dan peralatan sekolah kepada pelajar miskin menerusi program 'Kembali ke Sekolah' yang dianjurkan di Pulau Pinang baru-baru ini.

Program yang berlangsung di AEON Bukit Mertajam itu telah disempurnakan oleh Menteri KPDNHEP, Datuk Seri Saifuddin Nasution Ismail.

Memetik kenyataan menerusi portal KPDNHEP, seramai 200 pelajar miskin dari sekitar Kulim, Bandar Baru dan Bayan Baru terpilih menerima sumbangan pakaian dan peralatan persekolahan.

"Sekolah yang terpilih adalah Sekolah Kebangsaan (SK) Junjong, Sekolah Jenis Kebangsaan Tamil (SJKT) Kulim, Sekolah Jenis Kebangsaan Cina (SJKC) Chong Heng, SJKT Ladang Sungai Ular, SK Kulim, SK Bandar Baharu, SK Relau dan SJKC Sin Min Junjong.

"KPDNHEP amat berbesar hati dan berbangga dengan keprihatinan serta inisiatif yang diambil oleh AEON bagi membantu meringankan beban golongan miskin terutamanya dalam aspek pendidikan," menurut kenyataan itu.

Sementara itu, AEON akan terus menggerakkan usaha dalam membantu golongan memerlukan selaras dengan tanggungjawab sosial korporat mereka bagi membantu melahirkan rakyat yang sejahtera.